

RESPONSES A QUELQUES OBJECTIONS QUE
l'on fait en faueur de Frere Jacques Dante-Cour, pour raison du
possession de la Cure ou Vicairie perpetuelle de S. Nicolas de Chaulny.

(note)
ker)

POUR l'intelligence desdites Responses & Objections, il faut
observer cinq ou six faits constans & veritables, lesquels resultent
incontestablement de tout le proces.

Primò, Que ladite Cure ou Vicairie perpetuelle de saint Nicolas est
scize, fondee ou deservie dans vne aisle de l'Eglise du Prieuré & Cure
Primitiue de Nostre-Dame de Chaulny, en vn Autel particulier; C'est
vn fait qui resulte de la scituation & de la constitution des lieux, lequel
fait est posé au proces, & ledit Dante-cour n'en disconuient pas.


Secundò, Que le nommé Frere René Morain, Chanoine Regulier
de Sainte Genevieve, a esté dernier Titulaire & possesseur de ladite
Cure ou Vicairie de S. Nicolas, & qui la aussi pretendu estre titulaire du
Prieuré & Cure primitiue de N. Dame: Cela se iustifie par la deuxiesme
& derniere piece de la Cotte D. du quatriesme Sacq, & par la premie-
re piece de la cotte C. au quatorzième Sacq.

Tertiò, Que le nommé Frere René du Pont aussi Chanoine Regu-
lier de lad. Congregation de Sainte Genevieve, a esté dernier Titu-
laire & possesseur dudit Prieuré & Cure Primitiue de Nostre-Dame, &
que par le deceds dudit Dupont, le nommé Adeline Chanoine Regu-
lier de la Congregation de Sainte Croix, a esté pourueu & mis en pos-
session d'iceluy Prieuré; Cela se void par les Prouisions & possession
dudit Adeline, qui sont les 4. & 5. pieces de la Cotte D. du premier Sacq.

Quarto, Que ledit Morain de Concert avec les Confreres de la
mesme Congregation, ne pouuant souffrir que ledit Adeline possédât
ledit Prieuré, à cause qu'iceluy Adeline estoit d'une differente Con-
gregation, a fait tout ce qu'il a pû, & a mis tout en œuvre pour l'en
deposseder; Cela se iustifie par l'exploit du Mars 1667. produit au
14. Sacq, pour premiere piece de la Cotte C.

Quinto, Que pour venir about de cette entreprife, ledit Morain avec
ledit Dante-cour, de Concert avec le Superieur de leur Congrega-
tion, auroient voulu supprimer & de fait auoient supprimé le Tiltre de
S. Nicolas, au moyen dequoy ils ont voulu establir & soutenir qu'en
ladite Eglise de Nostre-Dame, il n'y auoit point d'autre Tiltre que ce
luy de Prieuré Cure de Nostre-Dame.

De fait ledit Morain ayant fait assigner en la Cour ledit Adeline par
l'exploit sus remarqué, & ledit Adeline ayant comparu & deman-
de communication des Tiltres & Capacitez d'iceluy Morain lequel
n'auoit autre Titre ny possession que de la Cure de S. Nicolas; La
Congregation ordonna audit Morain de Resigner ~~la Cure~~ à vn sien



Confrere, sous le nom de Prieuré & Cure de Nostre-Dame de Chaulny, en faisant & suprimant le Tiltre de S. Nicolas, & pour cet effet le Supérieur de la Congregation nomma ledit Dante-cour, auquel ledit Moriain fit ladite Resignation, sur laquelle ledit Dante-cour obtint des Prouisions & prit possession dudit Prieuré & Cure Primitiue de Nostre-Dame, à l'Autel d'iceluy, & non point à l'Autel de S. Nicolas. Le tout se voit & se iustifie par les nomination, prouisions & possession dudit Dante-cour, produites au 4. Sacq sous Cotte B. & par lesdites nomination, Prouisions & Possession Conferées avec les possessions de Moriain & d'autres, produites au mesme Sacq, sous cotte D.

Sexto, Il est encore d'un fait tres-constant que ledit Dante-Cour en vertu desdites nomination, Prouisions & possession, en adherant aux poursuites dud. Moriain contre ledit Adeline, a contesté audit Adeline ledit Prieuré & Cure Primitiue de Nostre Dame, & pour justification de ce fait, La Cour peut se ressouuenir de la plaidoirie de Maistre de l'Hommeau Aduocat dudit Dante-cour, par laquelle il fut soutenu en l'Audience que la pretention dudit Adeline à l'esgard dudit Prieuré, n'estoit qu'imaginaire, & que ledit Dante-cour ne connoissoit point d'autre Tiltre, que celui de Prieuré & Cure de Nostre-Dame, dont il estoit en possession comme resignataire de Moriain. Sur laquelle contestation les parties ayant esté appointées, & ayans produit: Par Sentence du 5. Octobre 1669. ledit Adeline a esté maintenu dans ledit Prieuré & Cure primitiue de Nostre-Dame, ladite Sentence est produite au procez.

En consequence de laquelle Sentence ledit Adeline ayant veu ledit Dante-cour sans Tiltre & ladite Cure ou Vicairerie de S. Nicolas sans Titulaire, il s'en est fait pouruoir & en a pris possession.

Aujourd'huy ledit Dante-cour s'est plaint à la Cour, y a fait assigner ledit Adeline, & dit que par cette prise de possession de la Cure de saint Nicolas, ledit Adeline le trouble dans sa possession de la Cure de Nostre Dame; Cette plainte dudit Dante-cour est contenuë en sa Requête produite au 14. Sac pour premiere piece de la Cotte A.

Ledit Adeline deffend & dit que ledit Dante-cour se plaint à tort, & que luy Adeline n'a point pris possession de la Cure de Nostre-Dame, mais bien de la Cure de S. Nicolas, qu'il n'y a point de Cure de Nostre-Dame, si ce n'est le Prieuré & Cure Primitiue, dans laquelle luy Adeline a esté maintenu par Sentence contradictoire de la Cour, comme dit-est; Que mesme luy Dante-cour n'a point de Prouisions precises d'une Cure de Nostre-Dame, puis qu'il n'en a point d'autres que celles cy-dessus remarquées lesquelles il a obtenues par Resignation dudit Moriain, lesquelles sont dudit Prieuré-Cure Primitiue, & desquelles luy Dante-cour est décheu, en ayant esté debouté par ladite Sentence contradictoire du 5. Octobre 1669. & que par consequent il

ne se peut plus ayder desdites prouisions, & qu'au reste, si luy Dante-cour par sesdites Prouisions & possession pretend estre bien & Canoniquement pourueu de ladite Cure de S. Nicolas, il n'a qu'à s'expliquer, d'autant que luy Adeline deffend au contraire, soutenant qu'à luy seul appartient le possessoire de ladite Cure.

Sur ce nouveau differend les parties ont esté appointées, elles ont escrit & produit, & s'agit presentement de iuger lequel des deux dudit Adeline ou dudit Dante-cour doit estre maintenu en la Cure, que l'on dit estre de Nostre-Dame ou de S. Nicolas.

Toute la difficulté consiste à decider deux poincts; En premier lieu, si lad. Cure est de Nostre-Dame, ou de S. Nicolas dans l'Eglise dudit Prieuré de Nostre-Dame, & en deuxiesme & dernier lieu, lequel des deux contestans en est le legitime pourueu.

A l'égard du premier point, il est constant que par fondation, c'est à dire par l'Institution naturelle & essentielle de la chose, il n'y a iamais eû de Titre de Cure de Nostre-Dame autre que celle dudit Prieuré & Cure Primitiue de Nostre-Dame, dans lequel ledit Adeline a esté maintenu par ladite Sentence du 5. Octobre 1669. à la verité l'on voit bien par quelques pieces, que par vne simple enonciation ou ^{nomination} ~~denonciation~~, l'on a marqué vne Cure de Nostre-Dame; Mais ce ne peut auoir esté qu'une ^{nomination} ~~denonciation~~ abusive, prouenante ou bien de ce que ledit Prieuré & la dite Cure ont esté long-temps possédez par vne seule personne, ou bien de ce que l'un & l'autre sont sous le mesme toict: mais cette ^{nomination} ~~denonciation~~ abusive ne doit faire aucune consequence Iuridique.

Il n'en est pas de mesme du Tiltre de S. Nicolas, il est aisé de voir par les Visa & les Prouisions rapportées au procez (Que l'on appelle ordinairement des Institutions) & par les actes originaux des prises de possession produites par ledit Dante-cour mesme, au 4. Sacq corte D. il est dis-je aisé de voir que cette Cure est par fondation & par Institution naturelle & essentielle titrée de S. Nicolas; Ce qui doit faire vne consequence Iuridique, afin de ne troubler l'ordre de l'Eglise, & partant à l'égard de ce premier poinct, il n'y a point de difficulté de decider que la Cure en question est de S. Nicolas; & il est estonnant comme ledit Dante-cour en toutes ses escritures n'a point voulu reconnoistre cette verité, ce qui ne luy peut tourner qu'à blasme & en preiugé de sa perte.

A l'égard du deuxiesme poinct qui consiste à sçauoir lequel des deux contestans est canoniquement pourueu de cette Cure.

Il est constant que les prouisions & prise de possession dudit Daure-cour ne sont point de Cure de S. Nicolas; il est mesme constant qu'elles ne sont point precisement de Cure de Nostre-Dame, comme il pretend, mais bien du Prieuré & Cure de Nostre-Dame duquel il a pris possession à l'Autel d'iceluy; il est constant aussi qu'il a obtenu cesdites proui-

sions sous ce nom par resignation dudit Moriain en suprimant frauduleusement le Tiltre de S. Nicolas afin de despouiller ledit Adeline du Tiltre du Prieuré de Nostre-Dame ; De plus, il est constant que ledit Dante-cour en vertu de sesdites prouisions a contesté ledit Prieuré audit Adeline, & que ledit Dante-cour en a esté debouté ; & enfin, il est constant que lesdites prouisions & prise de possession sont raturées aux endroits essentiels, que mesme elles ne sont point insinuées ny accompagnées des degrez ny lettres de Tonsure legitime ; tous lesquels defauts ne se rencontrent point és tiltres & capacitez dudit Adeline ; & partant il n'y a pas d'apparence de pouuoir dire que ledit Danre-cour soit bien ny canoniquement pourueu de cette Cure. Il reste donc de conclure que ledit Adeline y doit estre maintenu.

L'on fait vne premiere obiection, & l'on dit qu'il y a plusieurs pieces fort anciennes produites au procez de part & d'autre qui font mention d'une Cure de Nostre-Dame & entr'autres certaines declarations testamentaires de trois ou quatre siecles.

A cette obiection ledit Adeline respond premierement, Que lesdites pieces ne sont ny tiltres ny pieces speciales faites pour la difference specifique, naturelle ou essentielle de la Cure en question, ce ne sont que paperasses, lesquelles tout au plus par vne simple enonciation qui ne prouue rien, marquēt & font mention d'une Cure de Nostre-Dame, mais *simpliciter enonciatiua nihil probant*, quand particulièrement ces sortes d'enonciations ne sont fondées que sur vne enonciation abusive & populaire.

Secondement, Il n'est pas vray (sauf la reuerence de la Cour) que lesdites declarations testamentaires fassent mention de Cure de Nostre-Dame, il y est bien fait mention de Prieur de Nostre-Dame, puis du Curé qui estoit dans ledit Prieuré ; mais en aucun endroit il n'est dit ny Curé ny Cure de Nostre-Dame.

Et troisiemement, Quand bien mesme dans ces sortes de tiltres & de pieces, il y auroit quelque mention faite de Cure ou de Curé de Nostre-Dame, cela ne peut ny ne doit faire aucune consequence iuridique, & il n'est pas au pouuoir des Iuges qui doiuent & veulent iuger selon la rigueur des Loix d'auoir égard à des pieces de cette nature, quand particulièrement on leur produit des tiltres contraires, & specialement faits pour l'institution specifique & naturelle de la chose, tels que sont les Visa, les prouisions anciennes & les prises de possession originales de ladite Cure en question sous le tiltre de S. Nicolas & à l'Autel particulier d'icelui ce sont ces tiltres là qui doiuent conuincre, si ce n'est que l'on veuille autoriser les fraudes & les abus & peruer tir tout l'ordre Canonique.

Il y a encore vne autre consideration en cette response, c'est que les prouisions dudit Danre-cour ne sont point précisément d'une Cu-

5
re de Nostre-Dame, mais du Prieuré & Cure de Nostre-Dame, & partant au pis aller, il ne pourroit se preualloir des pieces mentionnées en la presente objection, aussi n'a-ce pas esté son dessein dans la fabrique desdites prouisions de precisement vouloir se faire pouruoir de la Cure en question; son dessein n'estoit ^{que} de deposseder ledit Adeline du Prieuré ou Cure primitiue de Nostre-Dame.

L'on fait vne deuxiesme objection, & l'on dit, la contestation ne roule que sur vne equiuoque & sur ce que l'on a seulement pris vn nom pour vn autre, c'est à dire, que l'on a pris le Prieuré & Cure de Nostre-Dame pour la Cure de S. Nicolas.

A cela on respond qu'il ne peut y auoir d'equiuoque ny de mesprise, car lesdits Moriaïn & Dante-cour ont de propos deliberé & par vn dessein formé d'enuahir le tiltre du Prieuré ou Cure primitiue de Nostre-Dame, fabriqué lesdites prouisions & prise de possession sous tiltre precis de Prieuré & Cure de Nostre-Dame; La suite des procedures qu'ils ont fait l'un & l'autre en vertu desdites prouisions contre ledit Adeline pour raison du possessoire dudit Prieuré n'est que trop conuainquante de cette verité: Donc il ne peut y auoir eu d'equiuoque ny de mesprise, & la question n'est pas de *nomine* mais de *re*.

De plus, l'on appelle vne mesprise ce qui est fait par ignorance, ou bien ce qu'estant connu, l'on a tâché de corriger; Or ny Moriaïn ny Dante-cour n'ont pû ignorer le tiltre de la Cure de S. Nicolas, puis qu'à l'esgard de Moriaïn il en estoit le titulaire & en auoit pris possession, & qu'à l'égard dudit Dante-cour il en a produit les prises de possession originales tant dudit Moriaïn que des predecesseurs d'iceluy au 4. sac sous la cote D: & au surplus ledit Dante-cour bien loin de vouloir corriger sesdites prouisions, il continué toujours en toutes ses escritures & procedures de soustenir qu'il n'y a point de Cure de S. Nicolas, apres cela peut-on dire qu'il y a de la mesprise & ne doit-on pas dire qu'il y a plûtoſt de la supercherie & de l'obſtination toute euidente.

L'on fait vne troisieme objection, & l'on dit qu'il est toujours constant qu'il n'y a qu'une Cure dans l'Eglise de Nostre-Dame de Chaulny, laquelle ledit Moriaïn a resignée audit Dante-cour, & partant ledit Dante-cour y doit estre maintenu.

Cette objection est sauf la reuerence de la Cour, ou fausse, ou mal entendue en toutes ses parties.

Car premierement, il n'est pas vray que d'as l'Eglise du Prieuré de N. Dame de Chaulny il n'y ait qu'une Cure, il y en a deux par subordination, ſçauoir la Cure primitiue de N. Dame qui est le Prieuré; & la Cure de S. Nicolas, qui est la Cure Vicairrie: l'une & l'autre ayât le ſoin de ſeruir les ames, la premiere en chantant & faisant chanter l'Office Canonial, & en officiant les grandes Feſtes comme ayant l'intendance ſur la

Paroisse, ainsi qu'il est iustifié par vne piece authentique produite dans le procez au premier sac pour cinquiesme piece de la cotte C. Et la derniere en administrant les Sacremens.

Quant à ce que ledit Morlain a resigné audit Dante-Cour, il y a plus d'apparence qu'il luy a voulu resigner la Cure primitiue que la Cure Vicairie, quoy qu'il fust reellement possesseur de la derniere, & qu'il ne le fust que par imagination de la premiere; ce qui se iustifie non seulement parce que ladite resignation & les prouisions obtrenuës sur icelle sont en termes exprez du Prieuré & Cure de Nostre Dame & qu'en consequence desdites prouisions ledit Dante-cour a pris possession à l'Autel dudit Prieuré & Cure primitiue; mais encore parce qu'en vertu desdites prouisions & de l'acte de ladite prise de possession, il a contesté ledit Prieuré contre ledit Adeline, & en a esté debouté.

Donc l'on ne peut pas dire que *constet* que ledit Morlain ait resigné audit Dante-cour vne Cure particuliere, c'est à dire la Cure dont il est question, qui est la Cure de S. Nicolas, la resignation n'a pas esté assez sincere pour cela, on peut dire qu'elle a esté à deux visages, au moins dans l'usage qu'en a fait ledit Dante-cour, en ce qu'il la prise, tantost pour resignation du Prieuré ou Cure primitiue quand il a voulu depousseder led. Adeline dud. Prieuré: & presentement qu'il voit, qu'il est debouté de sa pretention, en ce qu'il voudroit la prédre pour vne resignation d'un autre Benefice particulier. En quoy la Cour voit l'inconstance du Resignant & du Resignataire, l'intention formelle qu'ils ont eue de confondre le Prieuré ou Cure Primitiue de N. Dame, avec la Cure & Vicairie, en suprimant le Tiltre de S. Nicolas: Et enfin l'incertitude du Benefice Resigné, ce qui est vne conuiction authentique de leur fraude; En sorte qu'apropriement parler, l'on doit dire que Morlain n'a Resigné audit Dantecour, ny l'un ny l'autre Benefice, du moins dans les formes Canoniques.

L'on fait vne quatriesme obiection, & l'on dit, ledit Adeline estant déjà pourueu & maintenu dans le Prieuré ou Cure Primitiue de Nostre-Dame, il ne le peut pas estre de la Cure & Vicairie, tant par ce que c'est la Mere & la Fille, que parce que ce sont deux Benefices incompatibles sans dispense, estans *Sub eodem tetto*; Outre que c'est vne trop grande auidité en la personne dudit Adeline.

A Cela l'on respond que la primauté Curiale du Prieuré, ne comprend point le droit de Patronage de la Cure & Vicairie de S. Nicolas; mais seulement la Superiorité de prééminences & prerogatiues, comme dit-est; & partant les deux Benefices ne sont point incompatibles, Outre qu'il est iustifié au procez, que ce n'est pas d'aujourd'huy qu'une seule personne a possédé les deux ensëble, c'est par l'11. piece du 13. sacq.

Pour ce qui est, du *Sub eodem tetto*, ledit Adeline iustifie de sa Dispense tant personnelle que locale, dans les Prouisions que sa Sainteté luy a accordées de ladite Cure de S. Nicolas: Et quand bien mes-

me il n'auroit pas cette dispense, il soutient qu'elle n'est pas necessaire, *Super Beneficijs difformibus*, Au respect des Benefices qui ont differentes fonctions; Elle est seulement necessaire, *Super Beneficijs uniformibus*, selon la pratique Beneficiale, Comme remarque fort bien Rebuffe, au Tiltre de *mandatis sur le §. Statuimus & Ordinamus*, Où il dit, *Nota tamen quod sine dispensatione potest quis Beneficium in eadem Ecclesia habere in titulum & Capellam, & potest esse quis Canonicus & Capellanus in eadem Ecclesia licet non possit duos Canonicatus habere.*

Mais quand il y auroit inhabilité de ce costé-là en la personne dudit Adeline, ledit Dante-cour n'en doit pas profiter, puisque n'ayant point de Titre ny de possession legitime, triennale, ny complete; son droit n'en est pas meilleur, & ledit Adeline seroit toujors receuable en tout cas à opter dans l'année, suivant la maxime.

De dire que c'est vne trop grande auidité dans la personne dudit Adeline, cette raison n'est pas luridique: Car où il a droit où il ne l'a pas; s'il ne l'a pas, il est condamnable; mais s'il l'a, on ne luy peut ny on ne luy doit oster sur cette raison friuolle d'auidité, laquelle est plustost de passion que de droit; & ledit Adeline espere de l'integrité & de la Capacité de ses Juges, qu'ils n'aurent esgard en la cause, qu'à ce qui est de la Loy & conforme aux Canons de l'Eglise.

Enfin ledit Dante-cour est tellement non-receuable en sa demande au possessoire de la Cure en question, que de quelque maniere que l'on puisse prendre l'affaire, il n'y a pas lieu de la luy pouuoir adiuger: Car la luy adiugera-t'on conformement à ses Prouisions qui sont du Prieuré & Cure de Nostre-Dame, ou à sa prise de possession qui a esté faite à l'Autel du Prieuré ou Cure Primitiue (il semble que Canoniquement l'on ne le peut pas faire autrement) neantmoins ce seroit aller directement contre la Sentence du 5. Octobre 1669. par laquelle contradictoirement & sans auoir esgard ausdites Prouisions, ledit Adeline a esté maintenu dans ledit Prieuré, & ledit Dantecour en a esté debouté.

La luy adiugera-t'on comme Cure de Nostre-Dame, ce seroit aller contre seld. Prouisions, qui sont de Prieuré & Cure de N. Dame, comme dit est, & de plus, bien loin de resister ou de remedier parlà à l'abus, ce seroit l'autoriser & l'introduire dedans l'Eglise, & donner lieu à vn mille de supercheries qui se feroient tous les iours pour supprimer des Titres.

La luy adiugera-t-on comme Cure de S. Nicolas; Il n'en est pas pourueu, & de plus il ne le veut pas, soutenant par tout, que le Tiltre de saint Nicolas est imaginaire. De dire que l'on ordonnera qu'il prenne de nouvelles Prouisions & Possession à l'Autel de S. Nicolas; Cela ne se peut, puisque l'Eglise & Sa Sainteté y ont pourueu en la personne dudit Adeline: En sorte qu'en vn mot, l'on ne peut point adiuger ladite Cure audit Dantecour sans introduire ou maintenir l'abus, en autorisant & fauorisant vn dol & vne fraude qui faulte aux yeux.

